

ꦲꦮꦶꦁꦲꦮꦶꦁ
AWIG-AWIG

ꦢꦱꦱꦤꦢꦤ꧀ꦱꦁꦲ
DESA ADAT SANGEH



ꦏꦺꦴꦩꦠꦤ꧀ꦠꦤ꧀ꦱꦺꦩꦤ꧀ꦏꦧꦸꦥꦠꦺꦤ꧀ꦧꦢꦸꦁ
KECAMATAN ABIANSEMAL, KABUPATEN BADUNG

ꦱꦏꦏꦱꦫꦱꦱꦏꦩꦱꦲꦶ
TAHUN MASEHI 2010

SAKA WARSA 1931, TAHUN MASEHI 2010

Sarga I

ARAN LAN WEWIDANGAN

Pawos 1

Palemahan Desa Adat Sangheh wates-watesnyane nyatur desa :

1. Sisi Kangin : Tegal Alas Wayah miwah Tukad Yeh Adeng.
2. Sisi Kelod : Tlabah Jambangan miwah Jengkuwung Subak Sangheh.
3. Sisi Kauh : Tukad Yeh Penet.
4. Sisi kaler : Margi Tanah Wuk, miwah jengkuwung subak Gerana.

Wewengkon

Desa Adat Sangheh ngwengku limang (5) banjar adat makadi munggah ring sor :

1. Banjar Adat Batusari.
2. Banjar Adat Brahmana.
3. Banjar Adat Sibang.
4. Banjar Adat Pamijian.
5. Banjar Adat Mulukbabi.

Desa Adat Sangheh kawangun antuk satus pitung dasa pat sepaon (karang desa) lan pat belas karang ayahan makadi munggah ring sor :

1. Banjar Adat Batusari 41 sepaon / karang desa lan 2 karang ayahan.
2. Banjar Adat Brahmana 30 sepaon / karang desa lan 2 karang ayahan.
3. Banjar Adat Sibang 33 sepaon / karang desa lan 3 karang ayahan.
4. Banjar Adat Pamijian 31 sepaon / karang desa lan 4 karang ayahan.
5. Banjar Adat Mulukbabi 39 sepaon / karang desa lan 3 karang ayahan.

Pawos 2

Setra

Desa Adat Sangeh ngamong setra apalebahan.

Sarga II

PETITIS LAN PAMIKUKUH

Pawos 3

Desa Adat Sangeh ngamonggehang pamikukuh minakadi :

1. Pancasila.
2. Undang-undang Dasar 1945.
3. Tri Hita Karana manut tata cara agama Hindu.

Petitis Desa Adat Sangeh sakadi ring sor :

1. Mikukuhin tur ngrajegang agama Hindu.
2. Ngwerdiang sukertaning desa lan jagat.
3. Ngutsahayang kawiklanan lan kaweruhan krama desa.
4. Nglanturang wiadin nglaksanayang piteket-piteket sang rumawos.

Sarga III

SUKERTA TATA PAKRAMAN

Palet 1

Indik Krama

Pawos 4

1. Sane kabaos krama desa adat inggih punika kulawarga sane magama Hindu, sane ngamong karang desa lan karang ayahan.
2. Sane ngenahin karang kedi utawi tanah sawah lan tegal sane sampun kaupakara tur sampun jangkep Tri Hita Karanannya.
3. Sajaba punika sinanggeh tamiu utawi panumpang.

Pawos 5

Krama desa adat miwah banjar adat wenten 3 (tigang) palet (Tri Angga) sakadi inucap ring sor :

1. Krama ngarep : Teges ipun kulawarga sane nanggap wiadin ngemong karang desa adat.
2. Krama panyade : Teges ipun kulawarga sane wenten dandanan waris saking krama ngarep tur magenah sajeroning palemahan desa adat.
3. Krama pangele : Teges ipun kulawarga sane madunungan netep ring krama ngarep wiadin magenah sajeroning palemahan Desa Adat Sangeh.

Pawos 6

Kawit dados krama desa :

1. Sangkaning ngamong karang ayahan desa.
2. Sangkaning jumenek ring wewidangan Desa Adat Sangeh langkungan ring enem sasih, malarapan ngenahin karang kedi, utawi tanah sawah lan tegal sane sampun kaupakara, saha jangkep Tri Hita Karanannya.
3. Sampun kajangkepin antuk ilikita saking desa lan banjar sane katinggal, sane nyihnayang tan kasangkut ring wicara.
4. Sampun naur pamogpog, saha pajati sajangkepnyane manut pararem banjar adat soang-soang.

Pawos 7

Dharmaning krama desa adat lan banjar adat sakadi inucap ring sor :

1. Ngepah ayu kahyangan minakadinnyane Kahyangan Tiga miwah sane tios-tiosan sane gumanti wantah kaamong antuk krama desa adat wiadin banjar adat.
2. Mecikang kalih ngwangun wewangunan sane kaamong olih desa adat wiadi banjar adat soang-soang.
3. Ngamedalang urunan kalih ayah-ayahan nganutin pararem banjar adat soang-soang.
4. Ngardi kasukertan desa adat malarapan antuk pikayun suka duka gilik saguluk salunglung sabayantaka.

Pawos 8

Krama desa adat ngarep patut ngamedalang urunan mepek lan ayah-ayahan lanang istri sajabaning krama sane balu.

Pawos 9

Krama panyade miwah pangele marupa patulung ngamedalang urunan kalih ayah-ayahan sakadi inucap ring sor :

1. Wewangunan desa adat ayahannyane matetulung.
2. Wewangunan banjar adat, ayah-ayahannyane matetulung tur kengin taler ngamedalang urunan manut pararem banjar adat soang-soang.
3. Ri tatkala ngwentenang upakara Pitra Yadnya, kalayu sekaran dedosan ring banjar adat patut keni urunan kalih ayah-ayahan taler keni mepek.

Pawos 10

Ikrama desa adat wiadin banjar adat tan kengin ngadol kalih ngadeang karang desa adat.

Pawos 11

Krama desa adat wiadin banjar adat tan wenang ngalah-alah karang wiadin tanah desa adat makadi kaanggen sawah yadiastun sane lian-lianan, yan durung polih kaingkupan olih krama desa adat ring paruman.

Pawos 12

Sane kengin wusan dados krama desa adat miwah banjar adat sakadi inucap ring sor :

1. Riantukan padem wiadin seda.
2. Riantukan magingsir genah saking palemahan Desa Adat Sangeh.
3. Riantukan kawusang dados krama desa adat olih krama desa adat duaning kulawarga inucap mamurug dharmaning makrama desa adat, sasampun katletek olih prajuru desa adat. Prajuru desa adat patut micayang sewala patra pakeling ring sang mamurug punika, tunggil asasih apisan.

Ring sampune jantos ping tiga prajuru desa adat micayang sewala patra pakeling ring sang mamurug taler sang mamurug punika dereng nginutin darmaning makrama desa adat patut kulawarga punika kawusang dados krama desa adat olih prajuru desa adat ring ajeng paruman desa adat. Ring sampune polih pangrawos kulawarga inucap tan kengin magenah ring palemahan Desa Adat Sangeh.

Pawos 13

Kulawarga sane sampun wusan dados krama desa adat manut pawos 12, nomer 1, 2, 3 wenang karang miwah paderbennyane sane wenten ring banjar adat sakadi jinah kas kalih sane lian-lianan wenang katrimayang ring krama sane ngentosin ayahan karang punika.

Pawos 14

Krama desa adat sane tan kadadosang ngranjing ka pura, luih ipun sakadi inucap ring sor:

1. Kulawarga kahanan cuntaka kapademan wiadin seda.
2. Kulawarga kahanan gering agung.
3. Kulawarga kahanan gering beseh.
4. Anaking setri lanji sane durung sinangaskara.
5. Kulawarga mamitra ngalang.
6. Kulawarga panganten sane durung mawidi widana pasakapan.
7. Rare durung masambutan.
8. Kulawarga istri daha sane tan dados ngraja sewala.
9. Kulawarga ngembasang rare dereng liwat bulan pitung rahina.
10. Kulawarga lanang sadurung rare kepus puser.
11. Kulawarga istri karuron dereng manut sengker.
12. Kulawarga istri ngraja swala.
13. Kulawarga istri beling kasanggama dereng sinangaskara.
15. Kulawarga cukil dekil.
16. Wewalungan suku pat yening tan ritatkala mapepada.
17. Sahananing barang-barang sane inucap leteh, inggih punika barang-barang sane mawit saking layon.

18. Sahananing layuban saking Manusa Yadnya miwah Pitra Yadnya.
19. Yan tan polih panugrahan saking prajuru adat.

Pawos 15

Sajeroning panyengker pura tan kengin nglaksanayang sakadi inucap ring sor :

1. Kulawarga sane sampun mayusa pitung warsa wiadin sane sampun maketus tan kengin mawarih lan mabacin.
2. Masanggama.
3. Kula warga sane sampun teruna miwah teruni sirep dados asiki.
4. Menahin wastra.
5. Marebat.
6. Mamisuh.
7. Mabaos bangras sane ngwetuang iyeg.
8. Munggah ring palinggih yan tan polih panugrahan saking prajuru utawi pamangku.
9. Tan dados nyusuin anak alit ring pura.

Pawos 16

Yening wenten kulawarga mamurug sakadi kecaping pawos 14, 15 wenang kulawarga inucap katibenin danda mrayascita nyarunin kahyangan, agung alit manut pararem desa adat, kalih manut kecaping lontar prakertian pura.

Pawos 17

Busana adat ritatkala ka pura lan masuka duka manut sakadi ring sor :

1. Muspa ngangge wastra, kampuh, kuaca lan destar.
2. Ri tatkala ngayah ring pura tur ngilenin Ida Betara, sane istri mawastra, mapetet, makuaca, masenteng tur sane lanang ngangge wastra, kampuh, kuaca kalih maslempot tur destar.
3. Masuka duka ngangge wastra kalih slempot tur ngangge destar.
4. Kundangan ngangge wastra, kampuh, destar.

Pawos 18

Yening wenten mamurug kadi inucap ring pawos pitulas patut kadanda manut pararem

Pawos 19

Yusa sane sandang ngayah banjar, sakadi inucap ring sor :

1. Yening kantun wenten ayah pangarep, yusa sane ngayahang ayah pangarep yan lanang lan istri sampun mayusa limolas warsa.
2. Yening tan kantun wenten ayah pangarep, ayahan lanang lan istri sampun mayusa telulas warsa.

Makakalih yusa sane sandang patut ngayahang ayah banjar puniki minakadi ayahan lanang kalih istri yan sampun tan kantun masekolah. Yan kantun masekolah sampun mayusa limolas warsa patut keni ayah pangarep.

Pawos 20

Yening wenten kula warga lan warga tamiu madunungan utawi nginep ring palemahan Desa Adat Sangheh, patut sang kadunungan punika digelis nyaduang ring prajuru banjar adat lan dinas tur salanturnyane prajuru banjar nyaduang ka prajuru desa adat. Yan mamurug wenang katibakin danda manut pararem, pah-pahannyane: asiki pah kalih ka banjar adat lan asiki pah kalih ka desa adat.

Palet 2

Indik Prajuru

Pawos 21

Krama Desa Adat Sangheh kaenter olih Bendesa Adat sane kaabih antuk prajuru desa adat sane mawit saking soang-soang banjar adat. Pah-pahannyane sakadi ring sor :

1. Bendesa Adat.
2. Patajuh.
3. Panyarikan.
4. Juru raksa.
5. Kasinoman.

Tata cara ngadegang prajuru :

Ngadegang Bendesa Adat lan prajuru desa adat manut tata cara sakadi ring sor :

- ha. Mawit saking krama wedan.
- na. Mayusa petang dasa warsa, salangkung-langkungnyane pitung dasa warsa.
- ca. Sampun marabian.
- ra. Tan ceda angga tur uning ring tata adat agama Hindu.

Pawos 22

Ring sajeroning banjar adat kaenterang antuk prajuru banjar adat sane kawastanin sakadi inucap ring sor :

- 1. Kelihan Adat pinaka panua.
- 2. Kasinoman pinaka juru arah.

Piteket

Yening Bendesa Adat pacang ngwentenang dedauhan ring krama desa, patut Bendesa Adat nibakang baos ring Kelihan Adat, tur Kelihan Adat raris ngrauhang ring Kasinoman. Bendesa Adat lan Kelihan Adat kaambil saking Krama Desa Adat, tur kapilih olih krama desa adat lan banjar adat.

Pawos 23

Ngadegang Bendesa Adat miwah Kelihan Adat patut kawentenang pamilihan. Pamilihannyane nyabran limang warsa sawawaning wenten indik sane menawi ngwentenang biyuta.

Pawos 24

Tata kramaning krama desa adat miwah krama banjar adat mamilih wiadin ngrarianang prajurunnyane patut nginutin tata cara sakadi inucap ring sor :

- 1. Ngwentenang saba pamucuk pacang ngadegang wiadin ngrarianang prajuru inucap.

2. Sabha sane kamanggehang yening krama desa adat wiadin krama banjar adat sampun ngamiletin peparuman katahnyane atenga langkung asiki saking krama desa adat sane ngamiletin peparuman wiadin langkungan.
3. Pamutus sane kamanggehang, inggih punika pasuara sane molih katahnyane kalih pah tiga saking krama desa adat sane ngamiletin paruman wiadin langkungan.

Pawos 25

Bendesa Adat kalih Kelihan Adat kagentosin riantukan parindikan sakadi inucap ring sor:

1. Riantukan padem utawi seda.
2. Riantukan pinunasnyane.
3. Riantukan kawusang.
4. Riantukan matilar saking Desa Adat Sangeh.
5. Riantukan sampun telas panumayannyane limang warsa.

Pawos 26

1. Bendesa Adat miwah Kelihan Adat kangkat kadegang ping tiga ngambel swadarmaning Bendesa Adat lan Kelihan Adat, sampun kagentosin antuk Bendesa Adat lan Kelihan Adat anyar. Bendesa Adat lan Kelihan Adat sane sampun polih ngambel ping tiga, yan yusannyane durung langkung 70 warsa kangkat kadegang malih.
2. Bendesa Adat miwah Kelihan Adat sakirang-kirangnyane tigang masa pamilihan wiadin limolas warsa masehi numpuk kaadegang dados prajuru, yan prade wusan sangkaning becik sandang kawehin lekita makadi kajanalokan ng aargiang dharmaning prajuru, olih prajuru Desa Adat Sangeh tur polih cihna yasa marupa ali-ali emas 22 karat manut pararem.

Pawos 27

Suwadarmaning Bendesa Adat lan Kelihan Banjar Adat.

Swadarmaning Bendesa Adat lan Kelihan Banjar Adat, Desa Adat Sangeh sakadi inucap ring sor:

1. Ngenterang sadaging awig-awig Desa Adat Sangeh miwah pararem desa.
2. Nguwehin tetimbang ring paruman desa adat.
3. Maosin kalih niwakang pamutus wicara luire :
 - ha. Yan ring desa olih Bendesa Adat.
 - na. Yen ring banjar olih Kelihan Banjar Adat.
 - ca. Prade kantun piwal kasukserah ring sang ngawa rat.
 - ra. Wicara sane kabaosin inggih punika sane nungkasin sadaging awig-awig lan pararem Desa Adat Sangeh.
 - ka. Ri kala maosin, Bendesa Adat kasanggra antuk pangabihnyane.
4. Ngukuhang Kelihan Banjar Adat sane sampun kasudi olih krama banjar adat.
5. Nguwehin saparindik wewangunan lan druen desa adat.
6. Paruman paripurna desa adat patut kawentenang sakirang-kirangnyane awarsa apisan.

Pawos 28

Olih-olihan prajuru desa adat kalih prajuru banjar sakadi inucap ring sor :

1. Bendesa Adat.
 - na. Luput urunan kalih pakenan-kenan.
 - ca. Luput ring ayahan banjar adat.
 - ra. Polih olih-olihan manut pararem.
2. Pangabih Bendesa Adat.

Polih olih-olihan manut pararem saking jinah-jinah sane ngranjing ka desa sajabaning jinah-jinah urunan, jinah paweweh saking pemerintah, kalih jir 1 saking penggalan dana.
3. Prajuru banjar adat lan dinas polih cihnayasa saking banjar adat soang-soang lan desa adat manut pararem.

Palet 3

Indik Kulkul

Pawos 29

Yan wenten rare embas sakirang-kirangnyane tigang rahina saking dina embas, sang nuenang rare punika patut masadok ring Kelihan Adat, tur nyuarayang gendongan sakadi inucap ring sor :

1. Yening rare embas lanang limang klentungan.
2. Yening rare embas istri petang klentungan.

Pawos 30

Yan wenten kulawarga piwal sakadi kecaping pawos 29 wenang katibakin danda manut pararem.

Pawos 31

Cecirin suaran kulkul kadi inucap ring sor :

1. Yening kapanca baya minakadi kaamuk miwah sakancan sane kapikayun kalangkung mabaya suaran kulkul tigang tulud bulus.
2. Yening kapuunan, suaran kulkul bulus atulud madaging alon.
3. Yening kamalingan suaran kulkul bulus atulud.
4. Yening pangantenan suaran kulkul nung ting ping lima.
5. Yening kaicalan daha kaplegandang suaran kulkul bulus atulud madaging nungting ping lima.
6. Yening wenten kalayu sekar suaran kulkul tigang klentungan.
7. Yening makarya, suaran kulkul kalih tulud.
8. Yening ngarangin kulkul, suaran ipun aklentungan.
9. Yening urung makarya, suaran kulkul petang klentungan numpuk ping tigang.
10. Yening paruman jagat lan pelisan Kasanga patut nyuarayang gendongan jagat kalih tulud pinih ajeng, raris katut suaran gendongan soang-soang banjar adat.
11. Yening ngilenang yadnya, suaran kulkul nung ting alon.
12. Pangenten atulud biasa.

13. Yening bulan kepangan suaran gendongan jagat nungting tan pawates.

14. Yening wenten linuh suaran gendongan bulus nerus.

Pawos 32

Yening wenten kulawarga iwang antuka nepak kulkul, patut kula warga inucap kadanda manut pararem.

Pawos 33

Yening wenten suaran kulkul bulus raris nenten katanggurin olih banjar sane tiosan, patut banjar sane nenten nanggurin suaran kulkul punika kadanda manut pararem, tur ngranjing ring kas banjar sane kulkulnyane ngawit katepak.

Pawos 34

Yening wenten kulawarga nepak kulkul, ring sampune katureksin nenten wenten kabrebehan punapa-punapi patut kulawarga punika katibakin danda manut pararem, maliha yening kulkul bulus punika katangguran olih kulkul banjar tiosan kulawarga inucap kadanda manut pararem, soang-soang suaran kulkul sane nanggurin, tur ngranjing ring kas banjar sane kulkulnyane masuara, sajabaning katepak olih wong edan nenten kadanda.

Palet 4

Indik Paruman

Pawos 35

Sabha utawi paruman sane kawentenang netep, wenten tigang paos luih ipun sakadi inucap ring sor :

1. Sabha Desa Adat Sangeh, patut kawentenang nyabran warsa apisan ri tatkala ngembak geni.
2. Sabha banjar adat kawentenang nyabran sasih apisan ri tatkala rahina Buda Kliwon.
3. Sabha prajuru desa adat kawentenang nyabran sasih apisan ri tatkala rahina Anggara Wage.

Pawos 36

Sajabaning saba inucap ring ajeng manut pawos 35 taler kawentenang sabha nadak, inggih punika ri tatkala wenten bebaosan dahating mabuat pisan, ri kala i prajuru nenten mrasidayang micayang pamutus.

Pawos 37

Satunggil sabha desa adat miwah banjar adat sane sampun katetepang manut sakadi pawos 35 patut krama ngamedalang cane magilir genep saha reruntutannyane nginutin lontar urak,

Pawos 38

Yan prade wenten krama cedok tan ngamedalang cane tur sampun polih arah-arahan patut krama punika keni danda manut pararem banjar adat soang-soang.

Pawos 39

Yening wenten krama desa adat tan rauh wiadin cedok parum kalih tan wenten sadu ring prajuru patut krama punika keni danda manut pararem banjar adat soang-soang.

Pawos 40

Krama desa adat wiadin banjar adat kengin tan ngrawuhin ri tatkala parum miwah makarya, sane kawastanin pepuangkidan sangkaning sakadi inucap ring sor :

1. Riantukan sungkan.
2. Matepetin sungkan.
3. Kalayusekaran.
4. Ngwentenang yadnya miwah makarya pasuka dukaan.

Sahananing pepuangkidan sakadi inucap ring ajeng, patut sang mapuankid punika ngwentenang sadu riin ring prajuru.

Pawos 41

Sabha wiadin paruman kengin sampun kakawitin yan krama desa adat utawi banjar adat sampun ngrauhin pacang ngwiletin parum langkungan ring atenga. Asapunika taler ritatkala kawentenang paruman prajuru yan sampun langkungan ring atenga rawuh, wawu paruman kengin kakawitin.

Pawos 42

Pamutus paruman kamanggehang ring sampune polih pararem pasuara lintangan ring kalih pah tiga saking krama sane sareng ngamiletin paruman.

Pawos 43

Ri tatkala parum krama desa adat patut ngangge busana nganutin tata adat ngangge wastra miwah slempot lan destar.

Pawos 44

Yening wenten krama mamurug sakadi kecaping pawos 43 patut krama punika kadanda manut pararem banjar adat soang-soang.

Pawos 45

Ritatkala Kasinoman mapangarah wiadin madedauhan, prade umah sang karawuhin / kaarahin suwung wenang Kasinoman ngenahang sawen ring lawang sang kaarahin, makacihna sang maduwe paumahan punika sampun polih dedauhan. Sapunika ler sang nuwenang paumahan punika patut digelis nakenang ring Kasinoman paindikan sane katiba ring padewekannyane.

Palet 5
Indik Padruen Desa

Pawos 46

Desa Adat Sangeh nyungsung kalih nyungkemin pura wiadin kahyangan sakadi inucap ring sor :

1. Pura Puseh.
2. Pura Desa miwah Bale Agung.
3. Pura Dalem.
4. Pura Prajapati.
5. Pura Pucak Sari, Pura Melanting, Pura Tirta lan Pura Batan Pole, Palinggih Tanah Wuuk.

Pawos 47

1. Palemahan Pura Pucak Sari minakadi Alas lan sadagingnya, kalestariang olih Krama Desa Adat Sangeh.
2. Kulawarga Desa Adat Sangeh tan kengin ngusak-asik ring sajeroning alas minakadi ngambil taru, rencek, buah pala, menyan lan sane siosan sadurung polih pamutus saking Prajuru Desa Adat Sangeh.
3. Sadaging Alas wewidangan Pura Pucak Sari dados kaambil olih jagat sasampune wenten paetangan tur pamutus saking Prajuru Desa Adat Sangeh.
4. Yening wenten kulawarga Desa Adat sane mamurug wilangan 2 ring ajeng kadanda manut pararem.

Pawos 48

1. Sahananing paderben pura minakadi arta brana, sarwa uparengga miwah palaba marupa carik, kalih tegal patut kaetangang tur katureksin olih prajuru desa adat wiadin banjar adat. Tanah carik lan tegal pinaka laba palak jimbaranyane makanten ring pararem.
2. Padruen Desa Adat Sangeh minakadi usaha lembaga keuangan luiornyane mungguh ring pararem.

Asil tanah palaba Pura sane kamong olih pamangku kahyangan soang-soang, patut kanggen upakara pangaci tur polih paweweh manut pararem sakadi inucap ring sor :

1. Aci-aci nyabran Kajeng Kliwon.
2. Aci-aci Purnama Tilem.
3. Patoyan alit tunggil asasih.
4. Piodalan natengin tunggil ngenem sasih.
5. Pakiisan miwah panyepian.
6. Galungan miwah Kuningan.

Ring Pura Prajapati miwah Pura Pucak Sari wenten paetangan sakadi ring sor :

- ha. Pura Prajapati
- na. Ri tatkala pakiyisan kalih panyepian Pamangku nenten ngaryanin aci-aci sakadi ring ajeng.
- ca. Pura Pucak Sari.
- ra. Ri tatkala pakiyisan panyepian miwah piodalan mapulagembal ngenem sasih Pamangku nenten ngaryanin aci-aci sakadi munggah ring ajeng.

Sarga IV

SUKERTA TATA PALEMAHAN

Palet 1

Karang, Tegal lan Carik

Ring tepin karang paumahan soang-soang patut kakaryanin pawatesan minakadinnya antuk tembok utawi pagehan.

Pawos 51

Sajeroning karang paumahan kalih pagehan patut magaleng ka hulu teges ipun, magaleng kangin miwah kaler. Sane patut ngaryanin wates tembok utawi pagehan inggih punika sang sane madrue karang paumahan kalih tegal ring tebenan makadinniane sang sane magenah badauhan kalih badelodan.

Yening genah tanahnyane maundag-undag wates sane baduuran patut kakaryanin olih sang sane magenah baduuran.

Pawos 52

Sahananing tanah desa adat sane sampun katanggapang raris wenten paetangan pacang ngardinin wawangunan sane mapikenoh angge kabecikan sareng makweh, wenang tanah desa adat punika kambil tur sane nanggap punika patut kawehin pasilur tanah, kalih yan wenten tetangunan patut taler kaetangang, wiadin katukar antuk jinah nganutin agung alit karangnyane, wewangunan kalih pepayonannyane sane kambil tur jangkep saha upakarannyane.

Pawos 53

Karang desa adat sane patut kaluputin antuk ayah-ayahan inggih punika sakadi inucap ring sor :

1. Karang suwung raris ngawit katanggap, patut sang nanggap punika kauwehin luput ayahan suwen ipun enem sasih ngawit karang punika katanggap.
2. Karang sane katanggap antuk Kelihan Desa Adat, Sang Sulinggih kalih Pamangku Kahyangan sane kasungkemin antuk desa adat salaminnyane jejer ngamargiang swadarmannyane soang-soang.
3. Krama ngarep sane sampun lingsir mayusa langkungan ring pitung dasa warsa, kalih krama ngarep punika sungkan-sungkunan tan maderbe ayah panyade kalih pangele.
4. Ngeninin sengker luput ayah nomer 3 ring ajeng manut pararem.
Sajeroning ayah manut wilangan siki lan kalih ring ajeng mungguing pakenan-kenannya kalih urunannya patut keni mepek, sakewanten ring wilangan tiga luput manuk.

Pawos 54

Yening wenten karang kaputungan wenang prajuru Desa Adat nibakang karang punika pinih tampek ring krama panyade, pangambilnya saking dedandanan waris pinih tampek saking purusa, yan tan wenten saking purusa wenang katibakan dedandanan saking wadu. Yening makrama Desa Adat miwah Banjar Adat

Pawos 55

Yening wenten Krama Desa Adat Sangeh sane ninggalin karang desa riantukan ngrereh karya pangupa jiwa ka tios desa tur ayahan karangnyane tan wenten sane nyungkemin; kaping kalihnya tan wenten sadu ring prajuru desa adat miwah prajuru banjar adat salami sakadi ring sor :

1. Salami tigang sasih tan wenten ngayahang karang desa punika, wenang Desa Adat Sangeh muponin pepayonnyane ring karang punika, sajabaning sane magade ngangge ilikita.
2. Salami awarsa tan wenten ngayahang karang desa adat punika wenang prajuru desa adat ngrerehang ayah-ayahan, kaping ajeng kapatutannya saking purusa. Yantan wenten makekalih sekadi inucap ring ajeng, prajuru wenang nibakang ayah-ayahan punika ring krama desa adat sane sumanggup nginutin dharmaning makrama desa adat miwah banjar adat.

Pawos 56

Yening wenten karang desa adat munggah sakadi inucap ring pawos 54 punika, benjang pungkur rauh malih sang nuenang karang punika, sang wawu rauh punika tan dados malih ngwasayang karang punika.

Pawos 57

Yening wenten kulawarga ngalah-alah karang paumahan, tegal, margi, pura miwah tanah sane tiosan, wenang kulawarga punika katibakin danda ngulihang tanah punika, tur saha pangupakara, agung alitnyane manut pararem.

Pawos 58

Yan wenten karang paumahan ring karang desa adat miwah ring tegalan tan maderbe margi, wenang prajuru desa adat ngutsahayang nguwehan margi karang lan tegalan inucap.

Palet 2

Pepayonan

Pawos 59

Yening wenten wicara wit taru mentik sajeroning wates, wenang taru punika kaepah tiga, asiki katiba ring desa adat, kakalih katiba ring sang patut nruenang wates punika.

Pawos 60

Yening wenten entik-entikan sakadi tiing, pisang miwah sane lian-lianan mentik ngliwatin wates, wenang entik-entikan punika kataban olih sang nruenang palemahan sane kaentikan, sasampun ngwentenang sadu ring sang nruenang entik-entikan punika. Kaping kalih wenten taler sadu ring Klihan Adat wiadin Bendesa Desa Adat.

Pawos 61

Sakaluring ngawit mapamulan-mulan tanem tuwuh patut mapawaneng adepa agung saking pawatesan.

Pawos 62

Tan kengin sakaluring wewangunan kalih pepayonan ngungkulin kapisaga lan margi, napi malih sane ngwetuang baya majeng ring pisaga punika.

Pawos 63

Sakaluring pepayonan miwah pamulan-mulan sane sampun polih pamutus saking prajuru desa adat patut katotor, kacabut, kalih kaabas, utawi kaebah patut digelis kalaksanayang olih sang nruenang pepayonan punika, manut pawanengan sane katibakang salamin-laminnya mapawilangan kalih wuku.

Pawos 64

Yan sadurung lintang ring pawanengan sane katibakang olih prajuru desa adat, mawastu pepayonan punika pungkut wiadin empak tur mayanin kapisaga, sang nruenang pepayon punika luput saking kaiwangan.

Pawos 65

Yan sang sane maderbe pepayonan punika sasampune telas pawanengan sane katibakang olih prajuru desa adat dereṅ kalaksanayang ngebah wiadin notor pepayonan punika, wenang prajuru desa adat ngebah wiadin notor kayu punika tur olih-olihannyane katiba ring desa adat.

Palet 3

Wewangunan

Pawos 66

Bacakan sakaluiring sane nenten patut kalaksanayang majeng ring palemahan anak tios muah ring palemahan desa adat sakadi inucap ring sor :

1. Ngembahang toya minakadi toyan badan wewalungan, toyan pawaregan miwah sane tiosan sane ngwetuang ambu kawon.
2. Ngentungang leluhu, sarwa bangke ring pakarangan anak tios, ring margane, ring tlabah miwah tukad sajabaning ritatkala nganyut suku tunggal.

Pawos 67

Yan wenten kula warga mamurug manut kecaping pawos 66 wenang sang mamurug punika kadanda sakadi ring sor :

1. Yening mamurug pawos 66 wilangan siki keni kadanda manut pararem.
2. Yening mamurug pawos 66 wilangan kalih keni danda manut pararem.
3. Yening mamurug pawos 66 wilangan kalih magenah ring tlabah utawi tukad kadanda manut pararem.

Pawos 68

Kakedasan miwah kabecikan margine patut kakardinin olih krama desa adat manut pedum soang-soang banjar.

Pawos 69

Jlinjingan marga agung patut madalem pinih kedik petang dasa sentimeter malinggah seket sentimeter. Yan wenten ngardinin temuku ring jlinjingan marga agung patut madalem pinih kedik petang dasa saking lambe margine. Punika kakardinin mangda tan ngawenang margine lancah toya ritatkala blabar.

Pawos 70

Yening wenten kula warga mamurug sakadi inucap ring pawos 68 miwah pawos 69 wenang katibakin danda manut pararem, tur sami ngranjing ring kas Desa Adat Sangeh.

Pawos 71

Ring margi desa tan kengin nglaksanayang sakadi inucap ring sor :

1. Ngenahang barang-barang tan kengin lintangan ring atengah (1/2) margi.
2. Numbeg ngrereh sumati.
3. Numbeg gumana ngembahang toya.

Pawos 72

Yan wenten mamurug sakadi pawos 71, wenang kadanda manut pararem.

Palet 4

Wewalungan

Pawos 73

Yening wenten wewalungan ngeleb wiadin malumbar makadi, jaran, kebo, sampi, kambing, celeng miwah suku pat sane siosan, yan tan kaetut uri olih sang nruenang wewalungan punika, keni kadanda manut pararem.

Pawos 74

Yening wenten wewalungan ngeleb wiadin malumbar polih ngrusak pabian anak tios, wenang sang nruenang wewalungan punika kadanda manut pararem.

Pawos 75

Yan wenten anak polih naban wewalungan patut sang naban punika digelis nyaduang ring prajuru desa adat, tur wewalungan punika patut kapiara olih sang naban sapatut ipun. Prabeya miara wewalungan punika agung alit kaetangang olih prajuru desa adat tur sampun polih pararem.

Yan prade wewalungan punika padem wit saking baya kakaryanin sang naban punika patut katibakin danda, tur sang nruenang wewalungan punika taler tan patut katibakin danda prabea karusakan pabian. Bangken wewalungan punika patut kaserahang ring sang nruenang.

Pawos 76

Yan polih naban wewalungan jantos tigang rahina tan wenten sane ngangkenin patut wewalungan punika kasaduang ring Klihan Banjar Adat mangda nglanturang ring pemerintah.

Pawos 77

Yening wenten wewalungan jantos keni kataban, sang nruenang wewalungan punika patut ngamedalang panuku sakadi munggah ring sor :

1. Ring sang sane naban.
2. Ring Desa Adat.
3. Ring Banjar Adat.

Manut pararem.

Palet 5

Baya

Pawos 78

Bacakan sane ngwastanin Kahyangan kahanan durmanggala luih ipun sakadi inucap ring sor :

1. Kahyangan kasambar dening kilap.
2. Kahyangan karubuhan dening taru agung.
3. Kahyangan kasiratan dening rah manusa.
4. Kahyangan katiben geni (puwun).
5. Kahyangan karanjangan pandung.
6. Kahyangan karanjangan wong edan.
7. Kahyangan karanjangan wong sebel kandel.
8. Kahyangan kaentikin wong agung.
9. Kahyangan karanjangan lulut.
10. Kahyangan kahanan wangke manusa.

Pawos 79

Yan wenten kahyangan kahanan sakadi inucap ring ajeng manut pawos 78 wenang kahyangan punika kaprayascita utawi kacarunin agung alit manut pararem.

Pawos 80

Cuntaka wenten kalih pawos luih ipun sakadi inucap ring sor :

1. Cuntaka saking padewekan.
 - ha. Nganten dereng mabiyakala pasakapan.
 - na. Rare durung mayusa petang dasa kalih rahina.
 - ca. Ngembasang oka dereng tutug petang dasa dua rahina.
 - ra. Ngraja swala.
2. Cuntaka saking kalayu sekar.

Pawos 81

Sengker pangambilan cuntaka saking cuntaka padewekan kalih cuntaka kapademan sakadi inucap ring sor :

1. Cuntaka saking padewekan.
 - ha. Cuntaka saking pangantenan suen ipun salaminya dereng mabiya kala pasakapan.
 - na. Rare wawu embas suen ipun petang dasa kalih rahina.
 - ca. Ngraja sewala suen ipun tigang rahina.
2. Cuntaka saking kalayu sekaran yening mapendem utawi makingsan.
 - ha. Yan saking sameton banjar suen ipun tigang rahina saking pakutangan tur ring sampune tigang rahina patut sang nruenang layone ngaryanang Krama Banjar Prayascita.
 - na. Yan saking wadu suen ipun pitung rahina
 - ca. Yan saking purusa suen ipun roras rahina
 - ra. Yan ngarepin sajeroning karang paumahan suen ipun petang dasa kalih rahina.
 - ka. Yan desa wiadin banjar pacang ngwentenang Dewa Yadnya, krama tan kengin majenukan ngawit saking tigang rahina pacang ngawitin makarya.
3. Cuntaka kalayu sekaran embas yening sampun nglaksanayang.
 - ha. Yening nglanus sakewanten cuntakan ipun tigang rahina.
 - na. Yening ngaben sane ngarepin cuntakan ipun roras rahina.
 - ca. Ngasti yening sampun tigang rahina saking pangabenan.

Pawos 82

Sane tan keneng cuntaka luih ipun sakadi inucap ring sor :

1. Sang sane sampun maraga putus sakadi Ida Sang Sulinggih kalih Pamangku.
2. Ritatkala ngaturang dewa yadnya sasampune mapangalang sasih.
3. Banten wiadin upakara sampun munggah.
4. Sahananing sane kabaos leteh sampun maprayascita.
5. Yening sulinggih lebar nenten nyuntakanin.

Pawos 83.

1. Yan ri tatkala ngwentenang dewa yadnya, sampun nanceb pangalang sasih, raris wenten kula warga kalayu sekaran, sang nuenang sawa punika patut masadu ring prajuru mungguing ayah-ayahnyane polih pangapit saking paumahannya suang-suang.
2. Yening pangapit punika kapiambeng, sang sane maderbe kalayu sekaran patut polih pangapit sane katibakang olih prajuru banjar manut pararem.
3. Ri tatkala wenten krama makarya ayu ring sajeroning banjar sampun nanceb pangalang sasih, raris wenten krama kalayu sekaran ring banjar inucap tan kengin nyuarayang gendongan ping tiga.

Palet 6

Panyanggran Banjar

Pawos 84

Ri tatkala ngwangun yadnya suka duka kengin nunas panyanggran banjar. Pamargin panyanggran banjar manut ring pararem banjar soang-soang. Panyanggran banjar tan lepas ring gama dresta sane sampun mamargi ring bebanjaran soang-soang.

Sarga V

SUKERTA TATA AGAMA

Palet 1

Dewa Yadnya

Pawos 85

1. Palinggih utawi panyiwian Desa Adat Sangeh.
 - ha. Pura Desa, Bale Agung.
 - na. Pura Puseh.
 - ca. Pura Dalem.
 - ra. Pura Prajapati.
 - ka. Pura Pucak Sari, Pura Melanting, Pura Tirta, Pura Batan Pule miwah Tanah Wuuk.

2. Piodalan suang-suang kahyangan satunggil enem sasih kadi ring sor :
 - ha. Pura Desa Bale Agung satunggil Anggara Kliwon wuku Prangbakat.
 - na. Pura Puseh satunggil Buda Wage wuku Langkir.
 - ca. Pura Dalem satunggil Sukra Umanis wuku Ukir.
 - ra. Pura Prajapati satunggil Sukra Umanis wuku Merakih.
 - ka. Pura Pucak Sari, Pura Melanting, Pura Tirta, Palinggih Batan Pule, miwah Palinggih Tanah Wuuk satunggil Buda Umanis wuku Julungwangi.
3. Pangaci ring kahyangan desa inucap, agung alit manut kecap sastra agama kalaksanayang nista, madya, utama manut dresta.
4. Indik pangempon mecikang :
 - ha. Pura Pucak Sari, Pura Melanting, Pura Tirta, Palinggih Batan Pule, Palinggih Tanah Wuuk kabecikang olih krama Desa Adat Sangeh.
 - na. Pura Desa, Puseh, Dalem, Prajapati kabecikang olih krama Desa Adat.
 - ca. Ri tatkala mecikang parhyangan minakadi : padma, meru, gedong lan tapakan tan kengin ngamargiang atiwa-tiwa.

Pawos 86

1. Ring soang-soang pura kahyangan desa, wenang kaadegang Pamangku, asapunika taler kengin ngwentenang Pamangku langkungan ring adiri manut kabobotannya.
2. Ngadegang Pamangku inucap patut lanang istri parabian, nganutin dudonan pamargi sakadi inucap:
 - ha. Ngrereh saking katurunan utawi waris.
 - na. Mapinunas saking nyanjan utawi nunas pawuwus Ida Sang Hyang Widhi Wasa.
 - ca. Pamilihan krama desa adat wiadin banjar adat.
3. Ngadegang Pamangku mungging sakadi pawintenannyane upakarannya kamedalang olih desa adat.

Pawos 87

Kulawarga sane tan kaanggen Pamangku sakadi inucap ring sor :

1. Kulawarga sane buduh.
2. Kulawarga sane sakit ila.
3. Kulawarga sane sakit beseh.
4. Kulawarga sane cedangga.
5. Kulawarga sane panten.
6. Tan uning ring sastra.

Pawos 88

Swadarmaning Pamangku miwah sesananing Pamangku kahyangan patut manut sekadi lontar Yadnya Prakerti, Sangkul Putih miwah Widi Sastra sakadi inucap ring sor :

1. Ngenterang upacara ring kahyangan, utawi ring soang-soang paumahan krama desa adat makadi dewa yadnya miwah butha yadnya.
2. Ri tatkala Pamangku nyiratang wangsuh pada patut kalaksanayang ngawit saking ungkur.
3. Yening pamangku kahyangan ri kanjekan wenten kalayu sekaran wiadin seda sajeroning paumahannyane patut ngwentenang panyepuhan raga tur upakarannyane patut kamedalang olih desa adat.
4. Yening Pamangku ngrereh sebel, patut ngwentenang panyepuhan raga, tur upakarannya kamedalang olih Pamangku inucap.
5. Tan wenang salab sulub, yan sira mamurug wenang Pamangku inucap nyepuhin raga.
6. Pamangku nilar sesana, nasar, panyepuhan kamedalang olih Pamangku inucap.
7. Pamangku sane nilar sesana sane nasar, patut Pamangku punika kawusang dados Pamangku tur katiwakin teteganan sahananing upakara panyasap kalih upakara pawintenan majeng ring Pamangku sane pacang ngentosin.

Sahananing Pamangku kahyangan sane kasungkemin antuk desa adat polih olih-olihan sakadi inucap ring sor :

1. Pangangge putih wiadin kuning arangsukan ritatkala pawintenannya.
2. Pangangge putih wiadin kuning arangsukan tunggil ngatigang warsa katrimayang ri tatkala piodalan Menawa Ratna ring Pura Pucak Sari.
3. Luput ayah-ayahan.
4. Sarin canang prani ri tatkala piodalan jelih, kaepah olih juru canang kahyangan desa lan dang kahyangan.
5. Ri tatkala Pamangku kahyangan desa adat kalayu sekaran layonnyane tan kengin kapendem patut kageseng (Brahma Pratista) upakarannya sawa prenawa bebangkit siki sane kamedalang olih Desa Adat.

Pangayah ri tatkala piodalan majaba jero kalih sane utama patut nginutin sakadi ring sor

1. Ngawit saking Ida Bhatara memben, pangayah sane ngilenang Ida Bhatara mangda pangayah daha-teruna sakadi pangayah pangarep.
2. Ri tatkala piodalan majaba jero kalih utama, Pamangku tan kengin ngayabang aturan saking suang-suang pumahan sadurung puput ngayabang upakara pamucuk.
3. Aturan pamedek tios desa kengin kayabang sadurung ngilenang upakara pamucuk.
4. Sarana pamuspan sane pacang kanggen muspa, patut kabakta saking paumahan soang - soang, tur tan kengin ngangge sekar lungsuran.
5. Pangayah daa teruna patut ngaturang kidung lan rejang pendet.
6. Ri tatkala wenten anak muspa ring ajeng palinggih, pamedek tan kengin nyelag utawi ngadeg sajeroning genah pamuspan, sajabanig Pamangku.

Pawos 91

Pamangku kagentosin ri antukan :

1. Kalayu sekaran.
2. Sangkaning pinunasnyane ngraga.
3. Kanorayang antuk krama desa adat.

Pawos 92

Ri tatkala prerainan alit utawi prerainan jagat manut kecap sastra agama Pamangku kahyangan ngaturang puja wali manut dresta.

Pawos 93

1. Prerainan sane patut kamargiang olih krama desa wiadin banjar minakadi Somaribek, Pagerwesi, Tumpek Landep, Sugihan, Galungan, Kuningan, Saraswati, Purwani Tilem Kapitu miwah sane lian - lianan.
2. Ring Buda Kliwon Dunggulan sajeroning cuntaka, wenang krama desa ngaturang pujawali tur nanceb penjor ring lawangnya soang-soang pepek saha upakarannya.
3. Ring Tilem Kasanga, ring Desa Adat patut kawentenang tawur Kasanga, krama desa adat soang-soang patut macaru manut dresta.
4. Benjangne ngawit semengan jantos arahina patut ngamargiang panyepian sakadi inucap ring sor :
 - ha. Amati geni.
 - na. Amati karya.
 - ca. Amati lelanguan.
 - ra. Amati lelungan.
5. Yan wenten mamurug sakadi kecap ring ajeng wenang kadanda manut pararem.

Prerainan agung sane patut ngencak, sajawaning wenten paetangan tios, piteges ipun manut sakadi inucap ring sor :

1. Yan sasih Kapitu wuku Dunggulan, asapunika taler yan nuju Tilem tan wenang ngagalung riantukan rahina punika kawastanin Kala Rau.
2. Yan wuku Dunggulan sasih Kasanga, rah asia, tenggek asia taler tan wenang ngagalung riantukan rahina punika kawastanin Bhuta Mangsa upakarnya manut sastra agama.
3. Yening Tilem Kasanga kanjekin wuku Dunggulan sabanen Buda Kliwon Pahang tan wenang ngaturang tawur Kasanga miwah melis. Ring Tileming Kadasa irika wawu ngetut.

Palet 2

Resi Yadnya

1. Sang pacang madwijati miwah mapawintenan pinandita sakadi : Konteng, Pamangku miwah saluiring sane wenang ngaturang yadnya patut masadok riin ring prajuru desa utawi mapinunas ring Parisada Hindu Dharma manut sang ngwentenang sane mamargi.
2. Prajuru desa wenang sareng nureksin tur nyaksinin upakarannyane, saha nyobiahang ring paruman desa.
3. Sapasira ugi madwijati digelis ngentosin parab sang diniksa, antuk bhisama / bhiseka kawikon pamargan sang nabe, salantur ipun prajuru ngilikitayang.
4. Krama desa patut sareng ngremponin sakasidan ngaturang dana punia ri tatkala padiksan miwah ri tatkala ring lebar kawekas.

Palet 3

Pitra Yadnya

Pawos 96

Pamargin pitra yadnya madudonan manut sakadi inucap ring sor :

1. Ngupakarain sang kalayu sekar.
 - ha. Mapendem utawi ngeseng, makacihna makingsan ring ibu pertiwi utawi ring Sanghyang Ageni salami nutupang prabea.
 - na. Atiwa-tiwa (pangabenan) utawi palebon.
2. Upacara - upacara pitra yadnya ri wusan kabenang mawasta mungguh daun bingin wawu kalaksanayang nglinggihang dewa betara-betari.

Pawos 97

Swadarma lan tetegenan yening wenten silih tunggil krama desa kalayu sekar :

1. Sang kaduhkitan patut :
 - ha. Nyadokang ring Kelihan Desa Adat, tur nunas tetimbang ring kawentenane.
 - na. Nunas pamutus baos ring sulinggih ngeninin indik kawentenane sane kasuksara antuk Kelihan Desa Adat.
 - ca. Nyadokang ring Kelihan Adat Banjarnya kadi pamutus pamargi.
2. Swadarmaning banjar wiadin desa.
 - ha. Prajuru banjar maritatasang kawentenan sang kaduhkitan manut pinunasnya.
 - na. Prajuru banjar midabdabin panyanggran krama banjar salanturnyane petitis nunggilang tataning agama miwah tata sukertaning panyanggran luire :
 - (1). Ngamedalang patus manut pararem tur nyanggra krama sane kaduhkitan jantos puput.
 - (2). Busana krama banjar tatkala ngrombo karyan sang kaduhkitan manut dudonan bebuat karyannyane.
 - (3). Krama banjar patut madana punia ring sang kaduhkitan agung alit sakasidan.

Pawos 98

Setra sane kasungkemin antuk Desa Adat Sangheh kawastanin "Setran Hindu".

Pawos 99

Yening wenten kulawarga tios krama Desa Adat Sangheh jagi mapendem wiadin mageseng ring setran Desa Adat Sangheh, patut sang nruenang sawa punika nganutin paleh - palehan sakadi inucap ring sor :

1. Nunas pamargi ring prajuru desa.
2. Ngaturang pangaci nganutin tata cara agama Hindu.
3. Naur panukun setra luih ipun :
 - ha. Sane mapendem naur panukun setra manut pararem.
 - na. Sane matempung ngerit naur panukun setra manut pararem.

Pawos 100

Ring setrane tan kengin nglaksanayang sakadi inucap ring sor :

1. Nenten kengin nginepang bambang sawa.
2. Ri tatkala ngendag tan kengin muat tanah setra ka desa adat.
3. Tan kengin ngaryanang undag-undagan gumanti makarya kuburan permanen.

Pawo 101

Sajeroning wenten paetangan tios, rahina sane tan kengin ngutang sawa sakadi inucap ring sor:

1. Purnama miwah Tilem.
2. Perwani.
3. Kala Gotongan.
4. Semut Sadulur.
5. Pasah.
6. Prerainan jagat.
7. Nyandung.
8. Makirim wangke.
9. Tetiga apisan.

Pawos 102

Wangke sane patut kutang pramangkin miwah tan kengin inepang luih ipun sakadi mungguh ring sor :

1. Anak alit dereng maketus.
2. Kula warga seda mobot.
3. Kula warga keni gering agung, tur tan kengin kapendem patut kageseng.

Pawos 103

Sajeroning bebanjaran yening ngutang sawa langkungan ring asiki ring setra tunggal, sane nampekan patut mamargi riinan tur krama banjar patut kaepah samaliha tan kengin tulung katulung.

Pawos 104

Yening kalayu sekaran wit sangkaning salah pati, ulah pati kengin kabenang sawane bakta budal, sasampune sawa punika kaupakarain antuk upakara panebusan, pangulapan, tur katureksa yan bilih mabuat antuk sang ngawi wenang.

Pawos 105

1. Kalaning wenten krama desa adat kalayu sekaran upakarannya mapendem wiadin makingsan krama desa / banjar patut ngamedalang patus. Sahananing ilen-ilen sawa, pakaryannya kapaserah ring krama banjar adat jantos puput.
2. Kalaning wenten krama desa adat kalayu sekaran upakarannya swasta wiadin ngaben alit, krama banjar ngamedalang patus, tur majenukan krama banjar tan kengin kawales. Sahaning pakaryan ilen-ilen sawa kaserah ka Banjar.
3. Kalaning wenten krama desa adat kalayu sekaran upakarannya pranawa wiadin ngaben madya krama banjar ngamedalang patus, pakaryan kaserah ka banjar.
4. Kalaning wenten krama desa adat kalayu sekaran upakarannya sawa prateka wiadin ngaben utama krama banjar ngamedalang patus. Pakaryan kapaserah ring krama banjar jantos puput.

Pawos 106

Kalaning wenten krama desa kalayu sekaran, polih pagebagan banjar, sakadi inucap ring sor :

1. Yening kalayu sekaran upakarannya makingsan sawane kantun ring desa adat polih pagebagan.
2. Yening kalayu sekaran upakaranya pacang ngaben polih pagebagan manut pararem.

Pawos 107

1. Ri tatkala krama desa ngwangun karya pangabenan wenang krama banjar nedunang ayah panyade ayah pangele. Ayah-ayahan panyade miwah pangele patch sakadi ayah-ayahan pangarep tur tetegenan patus manut taler sakadi ayah pangarep.
2. Ri tatkala krama banjar ngamedalang patus ring ajeng wenten krama banjar mamurug nenten ngamedalang patus patut sang mamurug punika katiben danda manut pararem banjar.
3. Yening wenten krama banjar pangarep, panyade miwah pangele katiben sungkan ri tatkala ngamedalang patus, patusnyane kengin ngetut.
4. Patus sane kamedalang patut kalaksanayang ring bale banjar adat.

Pawos 108

Ri tatkala krama banjar makarya bambang pependeman sawa ring setra kalih genah pagesengan, mangda prajuru banjar nureksin pahpahan setrane sakadi inucap ring sor.

1. Pinih kaler genah sameton brahmana.
2. Pinih tengah genah sameton satria.
3. Pinih kelod genah sameton siosan nomer 1 lan nomer 2 ring ajeng sane magama Hindu.

Pawos 109

Sengker suwennya sawane kengin kagenahang ring paumahan manut sakadi inucap ring sor :

1. Yening mapendem kalih ngaben alit (swasta) kengin kagenahang sawa punika ring paumahan suen ipun kalih wuku.
2. Yening ngaben madya (pranawa) kengin ngenahang sawa ring paumahan suen ipun tigang wuku.
3. Yening ngaben utama (sawa prateka) kengin ngenahang sawa ring paumahan suen ipun enem sasih.

Pawos 110

Sengker yusan kulawarga sane kengin kabenang miwah sane tan kengin kabenang sakadi inucap ring sor :

1. Rare sane dereng mayusa tigang sasih wiadin satus lima rahina nenten patut kabenang.
2. Yening sampun mayusa lintangan ring tigang sasih nanging dereng maketus kengin kabenang nglungah.
3. Saking sampun maketus salanturnyane patut kabenang.

Pawos 111

1. Ri tatkala krama banjar ngamedalang sawa pacang ka setra, patut nganutin tata susila, tan kengin magujeg-gujegan miwah magarap, napi malih jantos sawane benyah, runtuh, sane ngawinang pitet kayun sang nuwenang sawa punika.
2. Yening jantos krama mamurug kadi ring ajeng, risampune layon wiadin sawa punika kagenahang ring pagesengan wiadin ring sisin bangbang patut krama banjar mrayascita pinih riin sadereng ngamargiang upakara sawa salanturnyane.
3. Ri tatkala ngeseng sawa tan kengin sawa punika katektek, kaintuk, katumbeg wiadin kacahcah miwah sane tiosan sakancan laksana tan nginutin susila.

Pawos 112

Ri tatkala krama desa ngaben sawa prateka patut sang nerbenang karya punika nyangu krama banjar manut pararem.

Pawos 113

1. Yening sang sulinggih lebar kengin mageseng ring Desa Pakraman sakewanten patut ngwentenang sadu pinih riin ring prajuru desa adat.
2. Abu saking puspan sang Sulinggih sane kageseng punika patut kaduduk kedas saking genah pagesengan punika.
3. Tiosan ring Ida Sulinggih tan kengin mapendem wiadin mageseng ring desa pakraman.

Pawos 114

1. Yening wenten kulawarga ngentungang sawa ring tlabah, ring sawah kalih ring tegalan anak tios, wenang sang nruenang sawa punika mrayascita utawi nyarunin tanah sane kaentasan sawa punika manut kecap sastra agama.
2. Yening wenten kulawarga kalayu sekaran ring pakarangan paumahan anak tios, carik, tegal anak tios, wenang sang nruenang sawa punika mrayascita tur nyarunin genah punika manut kecap sastra agama.
3. Yan wenten sawa kapanggih tan wenten anak ngangken sawa punika patut desa adat nglaksanayang upakara mrayascita ring genah sawa inucap, sasampune sawa punika kalaporang tur kagingsirang olih sang rumaos.

Palet 4

Manusa Yadnya

Pawos 115

1. Manusa yadnya matesges yadnyaning manusa ngawit saking patemoning kama petak kalawan kama bang, sakantun sajeroning garbha ngantos sadurunge kalayu sekar.
2. Upakara inucap manut dudonan sakadi inucap ring sor :
 - ha. Magedong-gedongan, ri tatkala pangrempinian sang istri.
 - na. Ri tatkala rare embas.
 - ca. Ri tatkala rarene kepus puser.
 - ra. Ri tatkala rarene mayusa 12 rahina (nglepas awu).

- ka. Ri tatkala rarene mayusa abulan pitung dina tutug akambuhan.
 - da. Ri tatkala rarene mayusa tiga sasih (masambutan).
 - ta. Ri tatkala rarene mayusa enem (6) sasih (aoton).
 - sa. Ri tatkala rarene wawu numbuhan untu (ngempugin).
 - wa. Ri tatkala rarene makupak utawi maketus (natab sesayut pangarti suara).
 - la. Ri tatkala sang putri wawu sebel (ngraja swala), sang putra sasampun ngembakin (ngraja singa).
 - ma. Mapandes utawi matatah.
 - ga. Mapawarangan (madengen - dengen).
 - ba. Mawinten (nunas panugrahan Sang Hyang Aji Saraswati).
 - nga. Majejegan ritatkala sampun madue kumpi ngarep.
3. Upakara-upakara inucap ring ajeng nista, madya miwah utama nganutin kecap sastra agama miwah catur dresta makabuatan prasida ajeg sima carane ring desa adat.
 4. Upakara-upakara inucap ring ajeng panut matut paican Ida Sulinggih nganutin kecap sastra agama miwah pelutuk.

Pawos 116

Yan wenten kulawarga embas buncing, embas dempet tur embas langkungan ring kekalih sang madrue pianak punika luput saking ngupakarain desa adat. Upakara desa adat kakaryanin olih desa adat jantos puput. Sang maderbe pianak asapunika patut ngupakara pianaknya kewannten. Teges buncing; rare medal kekalih pada maari-ari sane istri embas dumunan sane lanang ungkuran.

Pawos 117

Yening wenten kulawarga alaki rabi patut ngwentenang upakara mabiakala pasakapan tur katureksain olih prajuru banjar adat, taler patut nganutin pamargi sane sampun kadabdabin olih sang rumaos nganutin undang-undang nomor 1 tahun 1974 PP, Nomer 9 tahun 1975.

Palet 5

Bhuta Yadnya

Pawos 118

1. Bhuta yadnya inggih punika upakara prabia ring bhuta miwah kala.
2. Bhuta yadnya agung alit upakarannya nganutin genah saha dudonannya manut kecaping sastra agama miwah loka cara sakadi : segehan miwah tawur.
3. Bhuta yadnya agung alit upakarannya manut tetujon miwah lelakarannya luire :
 - ha. Segehan miwah sakaluiring sorohannya manut sastra agama.
 - na. Caru manut sorohnya sakadi :
 - Eka sata.
 - Panca sata.
 - Resi gana.
 - Panca kelud.
 - Panca sanak.
 - ca. Tawur agung manut sorohannya nganutin kecaping sastra agama sane wenang ring desa.
4. Tiosan ring upakara inucap ring ajeng wenten malih luire :
 - ha. Yadnya sesa katur satunggil wusan ngrateng.
 - na. Masesapuh sadurung ngaturang puja wali ring pura.

Pawos 119

1. Tawur Kasanga kalaksanayang ngwarsa apisan, nuju Tileming Kasanga kalaksanayang ring pempatan agung manut dresta sane sampun mamargi kapuputang antuk Ida Sulinggih.
2. Ring kanjekan tawur Kasanga kalaksanayang olih desa adat, tur pamarginnya nganutin pah-pahan manut pararem, ring lebu soang-soang krama patut kagelarang caru manut sastra agama maka pamuputnya ngangge tirta saking tawur Kasanga desa adat, sane kapica antuk Ida Sulinggih.

3. Tawur agung sane kamargiang ring desa kalaksanayang agung alit sakasidan satunggil 35 warsa apisan. Maduluran mupuk padagingan palinggih panyungsungan mapendeman daun, ngenteg linggih, mapaselang miwah mapendeman bagia pulakerti nganutin loka cara utawi dresta sane sampun mamargi manut sastra agama muang pelutuk sane kapica antuk Ida Sulinggih sakadi ring sor :
- ha. Ngusaba desa utawi nini ring Pura Desa Bale Agung.
- na. Ngusaba Dalem ring Pura Dalem.

Pawos 120.

1. Dedudonan pamargi panyepian desa miwah tawur Kasanga manut loka cara dresta sane sampun mamargi, sajaba wenten paetangan tios saking sang rumawos luire :
- ha. Ring pangelong ping roras pratima utawi pralinggan Ida Bhatarasane wenten ring pura-pura sawewidangan Desa Adat Sangeh, sajaba Pura Pucak Sari sampun malinggih ring Bale Agung.
- na. Ring pangelong ping telulas sami Ida Bhataralunga malasti, melis masucian ring genah masucian, sabudale Ida BhatarasKahyangan Tiga malingga ring Bale Agung nyejer jantos panumayan, tawur Kasangakalaksanayang.
- ca. Ring Tileming Kasangakalaksanayang tawur Kasanga, tur sadurung puput kamargiang, Ida Bhatarakaturan ganjaran sajangkepnyane raris budal kapayogan soang-soang, krama desa ngwentenang pangrupukan ring margi - margi tlajakan desa, taler ring paumahan krama soang-soang.
- ra. Sampun puput tawur Kasangakalaksanayang sajangkepnyane. Rahinabenjangne krama desa sami ngamargiang catur brata panyepian.
- ka. Ring rahinabenjangnyane ngembak geni kacihnayang antuk suaran kulkul desa tigang kentungan nyambung banban.
2. Prajuru desa lan banjar matilikin pamargin brata panyepian.
3. Yen prade ri kanjekan rahina panyepian nepek kanjekan piodalan ring pura, pamrajan miwah sanggah, bilih-bilih wenten silih sinunggil krama kalayu sekaran rare wawu embas, mayusa kirang ring tigang sasih, wenang nyadokang ring prajuru desa. Prajuru desa kasaksara ngamedalang ilikita pinaka cihna kawenangan ngangge suluh alit sane sunarannya tan makanten saking margi.
4. Ring kanjekan rahina ngembak geni kawentenang pasima krama.

Sarga VI

KASUKERTAN TATA PAWONGAN

Palet 1

PAWIWAHAN

Pawos 121

Saderenge ngrorod patut wenten sadu ring manggalaning banjar adat lan dinas, raris kalaksanayang pangambilan, ngawit saking irika sang pradana sampun minakadi druen sang purusa.

Pawos 122

Pawiwahan punika sampun kanggeh sah manut sakadi ring sor :

1. Widi widana.
2. Saksi Kelihan Adat, Kelihan Dinas, Kelihan Desa Adat.
3. Wenten ilikita, tur manut daging undang-undang Nomer 1 tahun 1974 saha PP Nomer 9 tahun 1975.

Pawos 123

Ri tatkala pangesahan pawiwahan punika, kalaksanayang olih Kelihan Adat, Kelihan Dinas, Kelihan Desa Adat tur sang purusa ngaturang prasdaksina saha sesari majeng ring Kelihan Desa Adat.

Pawos 124

Ri kalaning rahina kanjek padewasan pawiwahan, silih situnggil nenten rawuh santukan wenten karya dahating mabuat pisan sakadi wenten ring dura negara, miwah sane tiosan munggwing pawiwahan punika wenang kasahang nanging mangda wenten surat panyedek utawi surat pamekas olih sane tan rawuh. Ri tatkala natab banten pawiwahan sane tan rawuh wenang kagentosin antuk pangangge miwah kadutan / keris.

Pawos 125

Pawiwahan sane kamanggehang nenten sah sakadi inucap ring sor :

1. Natab upakara pawiwahan saking pepaksan.
2. Nenten wenten saksi kalih ilikita saking Kelihan Desa Adat.
3. Silih sinunggil nenten rawuh, tur nenten wenten surat panyedek saking sane nenten rawuh manut paos 123.

Pawos 126

Pah-pahan paderben ritakalaning palas marabi sakadi inucap ring sor :

1. Paderben wit saking guna kaya salaminnya marabi.
2. Sane istri polih siki pah tiga.
3. Sane lanang polih kalih pah tiga.
4. Kalaksanayang olih prajuru desa utawi Kelihan Adat saha Kelihan Dinas.

Pawos 127

Gamia wiadin gamia gemana; sane kawastanin gamia gemana inggih punika :

1. Masanggama sareng sato.
2. Masanggama utawi marabi ring sameton sodet kalih sameton kualon.
3. Masanggama lanang sami lanang utawi istri sami istri.
4. Masanggama wiadin marabi ring rerama istri / lanang, ring kapatutan rerama lanang miwah istri garis beneng.

Pawos 128

Darmaning alaki rabi.

1. Yening sang sane lanang makayun wusan marabi kengin kapatutang, yening sampun maciri sakadi ring sor :
 - ha. Sane istri sampun macihna terang nyolong semara.
 - na. Sane istri anasar laku.

2. Yening sane istri makayunan wusan marabi kengin kapatutang, yening sampun maciri terang sakadi ring sor :

ha. Sane lanang wangdu.

na. Sane lanang tan nguwehin pangupajiwa sakirang-kirannyane enem sasih.

ca. Sane lanang malih ngrereh rabi tan saking pararem irabi kelihan.

ra. Sane lanang nyolong semara.

Pawos 129

Yening wenten mamurug kecaping pawos 128 wenang katibakin danda manut pararem.

Pawos 130

Asumundung anglangkahi karang hulu nenten kamargiang, sakewanten tan ngirangin pikayun yening sane katiben paindikan punika ngwentenang upakara patiwangi.

Pawos 131

Ngrorod, paleh palehannyane sakadi ring sor :

Patut saking kulawarga sane lanang ngwentenang pajati kaumah reraman daane.

Piteketnyane mangda kulawarga daane uning ring daannyane ngrorod, tur palehan punika kalaksanayang ring rahina pangrorodannyane.

Pawos 132

Yening jantos awengi dahane ical tur tan wenten anak muat pajati, kala irika patut sang nuenang dahane ngwentenang sadu ring prajuru, pamekas pisan ring Kelihan Dinas wiadin polisi, risampune polih nyerepang daane punika.

Pawos 133

Nepak Gendongan

Reraman daane patut ngwentenang sadu riin ring Kelihan Adat ri tatkala pacang nepak gendongan punika, saking ngawit daane ical jantos maletan tigang rahina.

Pawos 134

Ngamudalang Anten

Sadurung antene budal ka jeron sang lanang patut ngwentenang sadu riin ring reraman daane.

Pawos 135

Ri sampune gendongan masuara ngantos puput kulawarga lanange nglukuang suaran gendongan punika.

Pawos 136

Marerasan

1. Parerasan teges ipun muputang baos sane mabuat majeng ring kaambil.
2. Ri tatkala pangambilan anak istri, sadurungnyane patut wenten sadu ring prajuru mawit saking irika daa inucap sampun minakadi padruen purusa.

Pawos 137

Pawiwahan majeng ring tios agama patut kaparisuda riin tur kasudiwadani sajangkepnyane.

Palet 2

Indik Balu / Nyapihan

Pawos 138

Balu punika wenten kalih palet luih ipun :

1. Balu nglintik inggih punika balu sane tan maderbe panyledii, balu istri utawi lanang. Indik ayah-ayahan keni pada asiki / asibak, utawi sakasidan yan tan sida antuk ngayah mangda digelis wenten sadu ring prajuru.

2. Balu ngempu inggih punika balu sane ngempu pianak utawi cucu kantun alit, nanging yan sampun mayusa limolas warsa wenten pikayun jagi masekolah wawu keni ayahan yan sampun tamat ring SMA. Indik ayahan asibak nanging pamedalan mepek.

Pawos 139

Yening i balu pageh ring paumahan somahnyane mungging paderbennyane wit saking waris kalih pangupa jiwa, wit guna kaya patut kapuponin, nanging tan kengin waris punika kaadol, kagadeang, utawi makidihang yan tan polih kabebasan saking pianaknyane miwah saking matuannya. Yening paderben saking tetatadan sang balu wenang saledangnyane.

Pawos 140

Sang balu wenang meras pianak yan sampun manut sakadi ring sor :

1. Sang balu kantun pageh ring paumahan somahnyane.
2. Saderenge balu sampun wenten pidabdab pacang ngidih pianak utawi meras nanging somahnyane kalayu sekaran.
3. Sampun polih kabebasan saking pakadangnya sane pinih tampek manut garis silsilah.

Pawos 141

Bacakan Sang balu sane nenten pageh sakadi ring sor :

1. Matilar saking genah kapatutan somahnya.
2. Ngamargiang laksana nenten manut anak marabi.
3. Nenten kasenengin olih pianak, miwah matua utawi pakadangan somah pinih tampek.

Palet 3

Indik Sentana

Pawos 142

1. Sane mawasta sentana luire : pratisentana miwah sentana peperasan.
2. Pratisentana mateges sentana sane mijil saking pawiwahan kapatutang. Sentana peperasan mawit saking meras.
3. Prade sentana mijil saking pawiwahan tan kapatutang, sakadi astra, panak bebinjat, yogya kamanggala antuk pangaskara manut sastra agama miwah loka dresta.
4. Prade pawiwahan nenten ngwentenang sentana wenang ngidih sentana antuk peperasan saha maduluran antuk upakara widi widana.
5. Yan prade sentana mijil wantah wadu sinanggeh sentana rajeg, tur mawak kapurusan kawekas yan mawiwaha ngidih anak lanang sane lanang mawak sentana nyeburin sakadi purusa kapradanan.

Pawos 143

1. Yening sinalih tunggil krama jagi ngayunang sentana, wenang matur upasaksi ring prajuru sanistane tigang sasih sadurunge meras.
2. Prajuru desa miwah banjar nureksa kawentenane tur nyiarang ring paruman krama. Prade sinalih tunggil krama tan lila, mangda matur piuning ring prajuru sajeroning kalih sasih.
3. Kelihan Desa Adat wenang mapaica pamutus baos, manut tan manut wenang tan wenange krama inucap meras sentana.
4. Prade sampun kapatutang Kelihan Desa Adat miwah Kelihan Banjar nyiarang ring paruman krama indik pamerasan punika.
5. Prade tan manut Kelihan Desa wenang ngandeg sang pacang makarya tur ngicenin pamutus baos, mangda prasida krama punika manut petitis tata sukertaning pakraman.
6. Prade panuntun prajuru tan kamanggehang (kacumpuin) manut, sang ngidih sentana punika nunas pamutus ring sang ngawi wenang (Pengadilan Negeri).

Pawos 144

1. Yening pamerasan sinanggeh patut kecihnayang antuk :
 - ha. Widi widana pamerasan.
 - na. Kasaksiang prajuru adat miwah dinas.
 - ca. Sampun kailikitayang, tur kasiarang ring paruman krama.
2. Sane patut kaperas kaangge sentana rajeg :
 - ha. Kulawarga magama Hindu tur sumanggup pacang nglanturang adat sang sane meras.
 - na. Pepernahan undage nedunang tur pinih nampek saking sang sane meras.
 - ca. Yan tan wenten sane tampek saking purusa wenang saking wadu yan tan wenten saking wadu dados saking krama.
3. Meras pianak kengin langkungan ring asiki.
4. Sang meras sentana wenang masadok ring Kelihan Banjar, Kelihan Banjar nyadokang ring prajuru desa (Kelihan Desa Adat).

Pawos 145

Yening wenten sentana kaceburin antuk rabinnyane patut pawiwahan punika klaksanayang ring genah sang istri punika.

Pawos 146

Kula warga sane maderbe pianak istri langkungan ring adiri tur nenten maderbe pianak lanang kengin ngrerehang sentana manut tetuweknyane.

Palet 4

Indik Waris

Pawos 147

1. Yening wenten sentana istri kaceburin antuk anak lanang tur sampun puput mungging polah palih pakurenannya, sentana istri punika tan kengin malih ngrereh anak lanang kaangge pasomahan.

2. Yening wenten kula warga lanang nyeburin sentana istri, tan kengin sang lanang punika ngrereh istri tiosan malih kaanggen somah, sadurunge polih kabebasan saking somah kalih matuannyane.

Pawos 148

1. Yening sentana istri punika seda, sang lanang sane nyeburin kengin malih ngrereh rabi ri sampun polih kabebasan saking matuannyane tur pianaknyane. Yan prade somahnyane sane wawu madrebe pianak, patut pianak punika polih paduman waris saking sentana.
2. Yening wenten kulawarga sane lanang nyeburan raris somah kalih matuanyane kalayu sekar tur pianak pianaknya kantun alit-alit, sang lanang nyeburin punika tan kengin ngrereh somah malih sadurunge pianaknya kelih / pantes ngayah banjar. Risampune pianaknyane kelih tur sampun uning ajak marerasan samalihnyane sampun polih kabebasan saking pianaknya, kala irika wawu sang lanang sane nyeburin punika kengin ngalap rabi malih.

Pawos 149

Kulawarga lanang nyeburin manut kadi kecaping paos 146 lan pawos 147 ring ajeng, sajeroning sang lanang nyeburin punika masomahan sareng rabinnya sane alitan, ngwentenang sentana, sentana punika wenang polih duman saking waris sentana.

Pawos 150

Yening wenten pianak istri salaminnya kantun pageh ring paumahannya wenang pianak istri punika muponin hasil wit saking waris reramannya, nanging tan kengin kadol, ngadeang miwah makidihang saderenge polih kabebasan saking reramannya miwah sametonnyane.

Pawos 151

Warisan kengin kaepah wiadin kakuasayang olih pianaknya sasampune reramannya seda tur sampun puput kabenang.

Pawos 152

Daha tua kalih teruna tua kengin ngidih pianak

Sarga VII

WICARA LAN PAMIDANDA

Palet 1

Indik Wicara

Pawos 153

1. Sane kabaos indik wicara, sahananing kacorahan miwah sahananing sinanggeh nungkasin awig-awig, pasuara, pararem, patut pramangkin kabaosang tan nyantosang pasadok.
2. Sahananing pamargi nyarah wiadin nusta ring genah sane suci utawi nyarah brana sane suci sakadi ring :
 - ha. Kahyangan.
 - na. Dadia wiadin pamaksan.
 - ca. Sanggah / pamrajan.

Kulawarga sane nyorah punika patut katibakin pamidanda manut pararem.

Pawos 154

Yening wenten kulawarga nyarah, ngenahang sane kasinanggeh leteh minakadi : tulang jadma, wastra romon miwah sane tios - tiosan sane kaanggehang romon ring genahe sane kaanggehang suci sakadi paos 152, wenang kulawarga inucap mrayascita utawi nyarunin genah punika, agung alit manut dresta.

Pawos 155

Yening wenten kulawarga sane malaksana corah, wenang kulawarga punika keni danda manut pararem.

Pawos 156

Ring margi palemahan desa, tan kengin nglaksanayang sakadi ring sor :

1. Ngangon watek suku pat.
2. Ngenahang barang-barang sajeroning margi langkungan ring awai.

3. Masiram ring jlinjingane sajeroning margi agung.
4. Kulawarga lanang istri tan ngangge kuwaca sampun mayusa telulas warsa.
5. Ngutang lelemekan lan leluu ka jlinjingane.

Pawos 157

Yening wenten kulawarga mamurug silih sinunggil pawos 156 wenang kadanda manut pararem.

Palet 2

Indik Pamidanda

Pawos 158

Yening wenten kulawarga desa tan buntas ngamedalang urunan sane sampun kararemin paleh-palehan ipun sakadi inucap ring sor :

1. Ring panemaya naur kengin mupul.
2. Ring asasih sampun panumayanne naur taler tan katawur patut katikelang.
3. Ring kalih sasih sampun panumayane naur taler nenten kataur, patut karampag.

Pawos 159

Sane kengin karampag luar ipun :

1. Ingon-ingon suku kalih utawi suku pat.
2. Entik-entikan utawi pepayonan.
3. Arta brana paderbennyane.

Pawos 160

Sane tan kengin karampag luar ipun :

1. Prabot pawon.
2. Ilen-ilan upakara manut agama.
3. Prabot undagi.

4. Prabot pacul.
5. Tanah pakarangan, tegal miwah sawah lan wewangunan.

Pawos 161

Pamargin rerampagan manut sakadi paleh-palehan ring sor :

1. Sadurung ngamargiang rerampagan, pinih riin patut ngwentenang pakeling ring sang sane pacang karampag pinih tampek asasih.
2. Ri tepengan ngrampag prajuru kasarengin antuk krama desa kalih krama banjar, tur paderbeyannyane kaadol.
3. Yening utang punika katawur ring rahina rerampagan, wenang danda wehin danda malih pah lima saking piutangnyane.
4. Yening olih-olihnyane ngadol barang - barang rerampagan punika langkungan ring piutangnyane patut kawaliang ring sane karampag.

Pawos 162

Yening wenten kulawarga utawi krama desa mendem sawa ring desa adat, kulawarga punika patut kadanda manut perarem.

Sarga VIII

NGUWAH-UWUHIN AWIG-AWIG

Pawos 163

1. Awig-awig Desa Adat Sangheh puniki kengin kauwah - uwuhan yening sampun kasungkemin antuk kalih pah tiga saking pupulan Desa Adat Sangheh.
2. Paruman inucap mangda kadasarin antuk pakarsa krama desa adat yadiastun kamedalang antuk prajuru sinunggal wiadin sinarengan.

Pawos 164

1. Sakaluiring sane wenten saderengnya patut kaanutang ring sadaging awig-awig puniki.
2. Sakaluiring sane durung kabaos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem jagat.

Sarga IX
SAMAPTA

Pawos 165



1. Awig-awig puniki kawastanin Awig-Awig Desa Adat Sangeh.
2. Awig-awig puniki kamargiang ngawit kaingkupin utawi kasungkemin.

Pawos 166

1. Awig-awig puniki kasungkemin ring paruman duk rahina Soma tanggal ping limolas sasih Kalima, Saka warsa 1931, tanggal 2 Nopember tahun 2009, ring Desa Adat Sangeh.
2. Awig-awig puniki kalingga tanganin antuk Bendesa Adat, Panyarikan saha kasaksinin olih Perbekel Desa Sangeh lan Camat Abiansemal tur kasahang olih Bupati Badung.
3. Luir sang nglingga tanganin :

Bendesa Adat Sangeh

Panyarikan Desa Adat Sangeh




Drs. Ida Bagus Dipayana, MM

Ida Bagus Putu Gandem, S.Pd.

Kesaksinin olih :



Ida Bagus Made Anom Karang, SE.



Drs. Ida Bagus Oka Dirga
NIP. 196205301986021002








Bupati Badung,












Anak Agung Gede Agung

PANGRIPTA AWIG-AWIG DESA ADAT SANGEH

NO	NAMA	LINGGA TANGAN
1	Ida Bagus Made Anom Karang, SE.	1 
2	Drs. Ida Bagus Ketut Dipayana, MM.	2 
3	I Wayan Maka	3 
4	Drs. Ida Bagus Putu Segara	4 
5	Drs. I Made Budiassa	5 
6	Drs. Nyoman Sumerta, MM.	6 
7	I Gusti Agung Made Sumarma, S.Pd.	7 
8	I Wayan Sukanta	8 
9	I Ketut Sukada	9 
10	I Gusti Ngurah Nyoman Sudana	10 
11	I Made Budi Sutomo	11 

12	I Gusti Alit Tresna Budi, SH.	12 
13	I Gusti Ngurah Adi Saputra	13 
14	I Gusti Made Kaler	14 
15	Ida Bagus Made Manik	15 
16	Ida Bagus Nyoman Alit	16 
17	Ida Bagus Putu Gandem, S.Pd.	17 
18	Drs. Ida Bagus Made Suanda	18 
19	Ida Bagus Made Natariana	19 
20	Dewa Putu Anom	20 
21	Ida Bagus Ketut Mulya	21 
22	Ida Bagus Ketut Astawa	22 
23	Ida Bagus Nyoman Cakri	23 
24	I Nyoman Sukadana	24 

25	Ida Bagus Putu Surya, AP., SH.	25 
26	Ida Bagus Made Sanjaya Putra	26 
27	I Nyoman Suradnyana	27 
28	I Ketut Reben	28 
29	I Made Sastrawan	29 
30	I Gusti Agung Putu Gangga	30 
31	I Made Soma	31 
32	I Nyoman Jagri	32 
33	I Made Palitra	33 
34	Ida Bagus Agung, SH.	34 
35	I Gusti Putu Kirab Suardana, BA.	35 
36	I Gede Eka Ambara	36 
37	I Nyoman Patru	37 

38	I Gusti Ngurah Putu Ariawan	38 
39	I Made Nengah Wija	39 
40	I Ketut Sadia	40 
41	I Made Rame	41 
42	I Wayan Nasib, BA.	42 
43	I Ketut Rapug	43 
44	I Made Merta Sedana	44 
45	Ida Bagus Nyoman Purna	45 
46	I Nyoman Latra	46 
47	I Wayan Darma	47